

Коррупцияга қарши кураш – кечиктириб бўлмайдиган вазифа



Коррупцияга қарши кураш – кечиктириб бўлмайдиган вазифа

Маълумки, Ўзбекистонда сўнгги йилларда коррупцияга қарши курашиш масаласи долзарб аҳамиятга эга бўлмоқда. ОАВларда деярли ҳар куни коррупция билан боғлиқ жиноятлар ёритилмоқда. Мазкур йўналишда Ўзбекистон кўплаб халқаро тадбирларда иштирок этмоқда. Куни кеча Тошкент шаҳрида Ўзбекистон Президенти Шавкат Мирзиёев иштироқида коррупцияга қарши курашиш мавзусида бўлиб ўтган йирик халқаро тадбир ҳам фикримизга далил бўла олади.

Мазкур халқаро тадбирда мамлакатимиз Раҳбари томонидан кўтарилиган масалалар, ташабbusлар ва умуман, коррупциянинг табиати, унда инсон омили ҳамда унинг салбий оқибатлари хусусида **Ўзбекистон Республикаси Президенти ҳузуридаги Стратегик ва минтақалараро тадқиқотлар институти бўлим бошлиғи, сиёсий фанлар бўйича фалсафа доктори (PhD) А.Юсупов** ўз фикр-мулоҳазаларини билдириди.

Аввало, шуни таъкидлаш лозимки, коррупция инсоният томонидан ўйлаб топилган энг хунук иллатлардан биридир. Ўзбекистон Президенти Шавкат Мирзиёевнинг коррупцияга қарши курашиш соҳасида юксак халқаро мукофотни топшириш маросимидаги нутқида таъкидланганидек “коррупция иллати ҳатто энг қудратли ва энг кучли давлатларни ҳам жар ёқасига олиб келган ва тўлиқ пароканда қилган”. Зеро, коррупция инсонларда **Ишонч** (давлатга), **Интилиш** (мақсадга) ва **Иштиёқ** (муайян фаолиятга) ҳиссини сўндиради.

Маълумки, узоқ йиллар давомида мамлакатимизда коррупция мавзуси медиа-маконда ва жамоатчилик орасида энг кам муҳокама қилинган мавзулардан бири эди.

2016 йилда бу борада ўзига хос **тектоник силжишлар** юз берди. Айтиш керакки, мамлакатимиз Президенти Шавкат Мирзиёевнинг ушбу лавозимдаги фаолиятининг дастлабки даврида имзоланган ҳужжатлардан бири — бу “Коррупцияга қарши кураш тўғрисида”ги Ўзбекистон Республикасининг қонуни (2017 йил 3 январь) бўлди. Аксарият одамлар ва ҳатточи экспертизасислар учун ҳам бу **кутилмаган қадам** эди. Ваҳоланки, биз бугун кўрмоқдамиз-ки, бу чукур ва пухта ўйланган, катта сиёсий ирода асосида қабул қилинган стратегик қарор бўлган.

Хозирда тўла ишонч билан айтиш мумкинки, коррупцияга қарши курашиш Ўзбекистонда давлат сиёсатининг энг устувор йўналишига айланиб улгурди. Буни сўнгги йилларда соҳага оид қабул қилинган сиёсий-хуқукий ҳужжатлар, маъмурий ислоҳотлар ва “инсон омили”ни камайтиришга қаратилган “рақамлаштириш” жараёнлари мисолида кўриш мумкин.

Таъкидлаш лозимки, **коррупция нафақат давлатнинг ёки жамиятнинг барқарор ривожланиши учун, балки ҳар бир шахснинг ҳаётига бўлган хавфдир**. Зоро, ҳар бир давлатнинг тараққиёти аввало инсон капитали билан узвий боғлиқ. Шу маънода, **давлат тараққиёти ва коррупцияга қарши курашиш — алоҳида қутблар эмас**, балки манфаатлар уйғун бўлган доимий тарзда кесишувчан ва ўзаро тўлдирувчан нуқталардир.

Яна бир муҳим жиҳат. Аксарият ривожланган, шу жумладан коррупция даражаси минимал бўлган давлатларда ушбу иллатга қарши курашишда асосан **превентив услублар** қўлланилади. Бу шуни англатадики, аввало коррупцияни келтириб чиқараётган шарт-шароитлар, яъни унинг “ўчоғи”га барҳам бериш кутилган натижани беради. Бошқача айтганда, **барча саъй-ҳаракатлар оқибатларга эмас, балки коррупциоген омилларга қаратилиши лозим** ва бу борада **илмий-методологик ёндашувга** асосланиш мақсадга мувофиқ.

Шу маънода, Ўзбекистон Республикаси Президенти Шавкат Мирзиёев ўз маъruzасида коррупцияга қарши курашишда нодавлат нотижорат ташкилотларини фаол жалб этиш, ўзаро тажриба алмашиб ва мулоқотларни кучайтириш, илмий изланишлар олиб бориш мақсадида **Коррупция муаммолари бўйича минтақавий тадқиқот марказини** ташкил этиш ташаббусини илгари сурди.

Бундан кўринадики, коррупцияга қарши курашиш фақатгина давлатнинг ёки муайян бир ташкилотнинг вазифаси эмас. Бу кенг жамоатчиликдан ва ҳар бир шахсдан юксак масъулият ҳамда сафарбарликни талаб этади. Шу билан биргаликда, ушбу ташаббуснинг **минтақавий аҳамиятга эга бўлиши бизнингча, Марказий Осиёнинг барча давлатлари учун бирдек долзарб ва муҳим**.

Шунингдек, Ўзбекистон Республикаси Президенти Шавкат Мирзиёевнинг Коррупцияга қарши курашиш соҳасида юксак ҳалқаро мукофотни топшириш маросимидаги нутқида яна бир бора “ҳалоллик вакцина”си тилга олинди ва бунда асосий эътибор янги авлодга қаратилди. Дарҳақиқат, коррупциянинг моддий зарарини қоплаш мумкин, лекин унинг жамиятга келтирадиган маънавий зарари ва оқибати келгуси авлодларга ҳам жиддий салбий таъсир қиласи. Шу жиҳатдан давлатимиз Раҳбари томонидан **БМТнинг Коррупцияга қарши таълим ва ёшларнинг имкониятларини кенгайтириш глобал ресурси дастурини Ўзбекистонда кенг жорий этиш** таклифи ўта муҳим ва стратегик аҳамиятга эга.

Таъкидлаш лозимки, давлатимиз Раҳбари ўз маъruzасида яна бир бор **Янги Ўзбекистонда амалга оширилаётган демократик ислоҳотлар ортга қайтмас тус олганини қатъий билдириди**. Бу борада коррупцияга қарши курашиш масаласи давлатнинг устувор вазифаси сифатида белгиланганини **Коррупцияга қарши курашиш бўйича 2030 йилгача мўлжалланган миллий стратегия ишлаб чиқиш тўғрисида** билдирилган таклифдан билиш мумкин.

Маърузада таъкидланган муҳим жиҳатлардан яна бири **коррупцияга қарши курашда Ўзбекистоннинг ҳалқаро ҳамкорликка тайёрлиги** бўлди. Хозирда Ўзбекистон ушбу йўналишда 15 та ҳалқаро ташкилотлар билан ҳамкорлик қилиб келмоқда. 20 дан ортиқ хорижий давлатлар

ваколатли идоралари билан ҳамкорлик алоқаларини ўрнатган.

Амалга оширилган ишлар натижасида сўнгги йилларда Ўзбекистоннинг **Transparency International** халқаро нодавлат ташкилотининг тегишли индексида ўрни муттасил яхшиланмоқда. Хусусан, 2022 йил натижаларига кўра, Ўзбекистон 180 давлат орасида 31 балл билан 126 ўринни эгаллади ва ўз ўринини 14 поғонага яхшилади (2021 йилда 140-ўрин). Ўзбекистон ушбу рейтингда охирги 6 йил давомида Шарқий Европа ва Марказий Осиё минтақасининг аксилкоррупция ислоҳотларини тизимли равишда амалга ошираётган ва ўсиш суръатларини қайд этаётган (2017 йилда 22 баллдан 2022 йилда 31 баллгача) давлатлар қаторида қайд этилмоқда. Бу борада мамлакатимиз **2030 йилга қадар мазкур рейтингдаги ўринин яна 50 поғонага яхшилашни мақсад қилган**.

Якунда шуни алоҳида таъкидлаш керакки, коррупцияга қарши кураш бу узоқ истиқболга мўлжалланган ва муайян жамиятда яшовчи ҳар бир шахсдан катта масъулият талаб этадиган жараёндир. Зоро, мамлакатимиз Раҳбари ўз маъruzасида таъкидлаганидек, «коррупцияга қарши курашиш ҳар бир соф виждонли инсоннинг, демократик жамият ва давлатнинг муқаддас бурчидир».

Айни вақтда, тўла ишонч билан айтиш мумкинки, коррупцияга қарши курашиш соҳасида Ўзбекистонда янги давр бошланмоқда.

Манба